

**BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO ENERGIJE, RUDARSTVA I INDUSTRIJE
MOSTAR**

**PROGRAM
UTROŠKA SREDSTAVA UTVRĐENIH U RAZDJELU 17. BUDŽETA FEDERACIJE
BOSNE I HERCEGOVINE ZA 2026. GODINU FEDERALNOM MINISTARSTVU
ENERGIJE, RUDARSTVA I INDUSTRIJE "KAPITALNI TRANSFERI JAVNIM
PREDUZEĆIMA – OTF D.O.O. SARAJEVO – ZA POVEĆANJA KAPITALA –
IZGRADNJA TERMINALA"**

Mostar, mart 2026. godine

1. UVOD

Projekat potpune sanacije Terminala tečnih naftnih goriva Živinice (u daljem tekstu: TTNG Živinice) izrađen je 2016. godine, dok je 2017. godine izvršeno izdvajanje I faze radova iz cjelokupnog projekta. Rekonstrukcija terminala prema I fazi završena je 2020. godine, čime je obezbijeđen skladišni kapacitet od 5.900 m³. Time su stvoreni osnovni tehnički uslovi za ponovno stavljanje terminala u operativnu funkciju.

S obzirom na protok vremena od izrade prvobitne projektne dokumentacije, razvoj novih tehničko-tehnoloških rješenja u oblasti naftne industrije, kao i potrebu povećanja ukupnih skladišnih kapaciteta, neophodno je izvršiti izmjene i dopune postojećeg projekta, uključujući modernizaciju predviđene opreme i tehničkih rješenja, ugradnju savremene opreme koja zadovoljava važeće industrijske standarde, osiguranje kompatibilnosti sa ostalim terminalima, kao i omogućavanje uvezivanja svih relevantnih podataka u informacioni sistem "Operator – Terminali Federacije" d.o.o. Sarajevo.

U tekućoj godini planira se realizacija aktivnosti kojima će se omogućiti proširenje kapaciteta terminala do cca 45.900 m³.

Polazeći od činjenice da je terminal operativan i u funkciji, prije pristupanja realizaciji II faze rekonstrukcije potrebno je osigurati sve tehničke, infrastrukturne i administrativne pretpostavke za zakonitu, sigurnu i nesmetanu realizaciju investicije. Pripremni radovi podrazumijevaju aktivnosti koje prethode izvođenju glavnih radova, a kojima se stvaraju uslovi za njihovo zakonito i efikasno izvođenje, a isti su predviđeni za realizaciju u okviru ovog Programa.

2. PRAVNI OSNOV

- Okvirna energetska strategija Bosne i Hercegovine do 2035. godine (Poglavlje 5. Energetski sektor BiH, 5.5. Sektor nafte i naftnih derivata);
- Strategija razvoja Federacije Bosne i Hercegovine 2021. – 2027. ("Službene novine Federacije BiH", broj: 40/2022);

3. ZAKONODAVNI OKVIR

- Budžet Federacije Bosne i Hercegovine za 2026. godinu („Službene novine Federacije BiH“, broj 6/26);
- Zakon o izvršavanju Budžeta Federacije Bosne i Hercegovine za 2026. godinu („Službene novine Federacije BiH“, broj 6/26);
- Zakon o Vladi Federacije Bosne i Hercegovine („Službene novine Federacije BiH“, br. 1/94, 8/95, 58/02, 19/03, 2/06 i 8/06);

4. CILJ PROGRAMA

Cilj Programa utroška sredstava je stvaranje tehničkih, infrastrukturnih i administrativnih pretpostavki za realizaciju II faze rekonstrukcije Terminala tečnih naftnih goriva Živinice. Namjenska sredstva koristit će se za realizaciju kapitalne investicije kroz pripremne radove koji prethode izvođenju glavnih građevinskih, mašinskih i elektro radova.

U okviru Programa predviđene su sljedeće aktivnosti:

1. Izrada Projekta pripremnih radova za II fazu rekonstrukcije Terminala Živinice;
2. Revizija projektne dokumentacije u skladu sa važećim propisima;
3. Ishodovanje svih potrebnih urbanističkih, građevinskih i drugih zakonom propisanih dozvola i suglasnosti;
4. Izvođenje pripremnih radova prema izrađenoj projektnoj dokumentaciji, uključujući pripreme građevinske radove, čišćenje i nivelaciju terena, zemljane radove, privremene instalacije i objekte, pristupne puteve, ograđivanje i organizaciju gradilišta;
5. Angažman stručnog nadzora tokom izvođenja pripremnih radova.

Realizacijom predviđenih aktivnosti osigurat će se potpuna spremnost za početak izvođenja radova II faze rekonstrukcije Terminala Živinice. Navedene mjere omogućit će realizaciju povećanja skladišnog kapaciteta terminala na cca 45.900 m³, te doprinijeti unapređenju sigurnosti snabdijevanja i jačanju energetske infrastrukture Federacije Bosne i Hercegovine.

5. KORISNICI I NAMJENA DODIJELJENIH SREDSTAVA

Korisnik sredstava po ovom Programu je "Operator - Terminali Federacije" d.o.o. Sarajevo. Namjenska sredstva dodijeljena ovim Programom koristit će se za realizaciju investicije koja se odnosi na pripreme radova za II fazu rekonstrukcije Terminala tečnih naftnih goriva Živinice. Aktivnosti predviđene Programom obuhvataju izradu Projekta pripremnih radova, reviziju projektne dokumentacije, ishodovanje svih potrebnih urbanističkih, građevinskih i drugih zakonom propisanih dozvola i suglasnosti, izvođenje pripremnih građevinskih i tehničkih radova, kao i obezbjeđenje stručnog nadzora tokom izvođenja radova.

6. SREDSTVA PREDVIĐENA ZA DODJELU

Ukupna sredstva predviđena za dodjelu po ovom Programu iznose 500.000,00KM, a osigurana su Budžetom Federacije Bosne i Hercegovine za 2026. godinu na razdjelu 17., glava 1701., Program - Upravljanje oblasti energije i rudarstva, na ekonomskom kodu 615400 - Kapitalni transferi javnim poduzećima - OTF d.o.o. Sarajevo - za povećanje kapitala - izgradnja terminala.

Za iznos ukupno utrošenih sredstava iz Budžeta Federacije BiH za 2026. godinu po ovom Programu, biće u istom iznosu izvršeno povećanje kapitala "Operator - Terminali Federacije" d.o.o. Sarajevo.

7. TRAJANJE PROGRAMA

Aktivnosti predviđene ovim Programom započet će odmah po usvajanju istog, pri čemu će se izrada projektne dokumentacije, ishodovanje potrebnih dozvola i provođenje procedura javnih nabavki provoditi kontinuiranom i intenzivnom dinamikom, s ciljem da se pripremi radovi započnu u aprilu 2026. godine, u skladu sa važećim zakonskim i podzakonskim propisima.

Ovaj Program traje do utroška sredstava, odnosno do završetka planiranih aktivnosti u skladu sa tačkom 4. ovog Programa, a najkasnije do kraja fiskalne godine.

8. TIJELA ZA PROVOĐENJE PROGRAMA

Tijela nadležna za provođenje i nadzor nad namjenskim korištenjem sredstava po ovom Programu su Federalno ministarstvo energije, rudarstva i industrije, Federalno ministarstvo finansija/financija, "Operator – Terminali Federacije" d.o.o. Sarajevo, svako u okviru svoje nadležnosti.

9. PLAN UTROŠKA NAMJENSKIH SREDSTAVA

Za realizaciju aktivnosti predviđenih ovim Programom, sredstva će se rasporediti po ključnim fazama, u skladu sa njihovom funkcijom i zakonskim zahtjevima. Sljedeća tabela prikazuje planirani utrošak namjenskih sredstava po pojedinim stavkama.

Tabela 1.

Stavka utroška	Predviđeni iznos	Opis aktivnosti
Izrada projektne dokumentacije	6.000,00 KM	Izrada Projekta pripremnih radova za II fazu rekonstrukcije Terminala Živinice
Revizija projekta	6.000,00 KM	Revizija projektne dokumentacije u skladu sa važećim propisima
Izdavanje i ishodovanje dozvola	32.000,00 KM	Ishodovanje svih potrebnih urbanističkih, građevinskih i drugih zakonom propisanih dozvola i saglasnosti
Izvođenje pripremnih radova	450.000,00 KM	Izvođenje pripremnih radova prema izrađenoj projektnoj dokumentaciji, uključujući pripreme građevinske radove, čišćenje i nivelaciju terena, zemljane radove, privremene instalacije i objekte, pristupne puteve, ograđivanje i organizaciju gradilišta
Stručni nadzor	6.000,00 KM	Angažovanje stručnog nadzora tokom izvođenja pripremnih radova
UKUPNO:	500.000,00 KM	

10. PROVOĐENJE PROGRAMA

Sredstva se dodjeljuju na osnovu ovog Programa i Ugovora o dodjeli sredstava, koji potpisuje Federalno ministarstvo energije, rudarstva i industrije, sa jedne strane i "Operator – Terminali Federacije" d.o.o. Sarajevo, kao korisnik, sa druge strane.

Ugovor obavezno sadrži sljedeće elemente:

1. Iznos i namjenu sredstava koja se dodjeljuju

Sredstva u iznosu od 500.000,00 KM su namijenjena za realizaciju investicije koja se odnosi na pripreme radove za II fazu rekonstrukcije Terminala tečnih naftnih goriva Živinice, i to:

- izradu Projekta pripremnih radova,
- reviziju projektne dokumentacije,
- ishodovanje svih potrebnih urbanističkih, građevinskih i drugih zakonom propisanih dozvola i saglasnosti,
- izvođenje pripremnih građevinskih i tehničkih radova,
- obezbjeđenje stručnog nadzora tokom izvođenja radova.

2. Dinamiku i način doznačavanja sredstava

Sredstva će se prenositi u tranšama (sukcesivno) na transakcijski račun "Operator – Terminali Federacije" d.o.o. Sarajevo nakon što "Operator – Terminali Federacije" d.o.o. Sarajevo dostavi Federalnom ministarstvu energije, rudarstva i industrije dokaze o realizaciji pojedinih faza aktivnosti, i to:

- Za izradu projekta pripremnih radova za II fazu rekonstrukcije Terminala Živinice:
 - pisani zahtjev za prenos sredstava,
 - potpisan ugovor sa projektantom i faktura,
 - dokaz o urađenoj reviziji projektne dokumentacije (potpisan ugovor, izvještaj o reviziji i faktura)
- Za ishodovanje dozvola i saglasnosti:
 - pisani zahtjev za prenos sredstava,
 - fakture i rješenja o uplati takse),
- Za izvedene radove:
 - pisani zahtjev za prenos sredstava,
 - potpisan ugovor o izvođenju radova,
 - ovjerene situacije za izvedene radove,
 - izvještaj nadzornog organa

3. Obavezu korisnika sredstava

Korisnik sredstava se obavezuje da:

- realizuje aktivnosti iz tačke 4. Programa u skladu sa važećim zakonima, tehničkim propisima i standardima,
- od nadležnih organa isходи sve potrebne dozvole i saglasnosti.
- pripremi tendersku dokumentaciju i provede postupak javnih nabavki, u skladu sa Zakonom o javnim nabavkama,
- osigura stručni nadzor u skladu sa Uredbom o uređenju gradilišta, obaveznoj dokumentaciji na gradilištu i sudionicima u građenju ("Službene novine Federacije BiH", br. 25a/22, 42/22 i 93/22), na način da će pripremiti tendersku dokumentaciju i provesti proceduru javnih nabavki u skladu sa Zakonom o javnim nabavkama za izbor nadzornog organa, te sa odabranim ponuđačem zaključiti ugovor o vršenju stručnog nadzora,
- uz svaki zahtjev za prenos sredstava dostavi svu potrebnu dokumentaciju (potpisan ugovor za radove, potpisan ugovor za nadzor, ovjerene situacije za izvedene radove i izvještaj nadzornog organa)
- izvrši plaćanje po fakturama izvođaču za izvršene radove, a dokaz o izvršenim uplatama za svaku stavku dostavi Ministarstvu

Nakon što se preparni radovi izvrše i Terminal Živinice bude spreman za izvođenje II faze rekonstrukcije, Ministarstvo može konstatovati da je cilj utvrđen ovim Programom ispunjen.

U slučaju da iznos sredstava potrebnih za realizaciju preparnih radova premaši sredstva predviđena ovim Programom (500.000,00 KM), "Operator Terminali Federacije" d.o.o. Sarajevo se obavezuje da obezbijedi dodatna sredstva za potpunu realizaciju planiranih aktivnosti.

11. KONTROLA UTROŠKA DODIJELJENIH SREDSTAVA

U svrhu kontrole namjenskog utroška dodijeljenih sredstava korisnik je dužan provesti odobrenu investiciju u cijelosti, u skladu sa potpisanim Ugovorom o dodjeli sredstava, te dostaviti Federalnom ministarstvu energije, rudarstva i industrije Izvještaj o provođenju odobrene investicije najkasnije u roku od 60 dana nakon završetka radova, odnosno dodjele sredstava po okončanoj stavci iz Tabele 1. predložene od strane "Operator – Terminali Federacije" d.o.o. Sarajevo.

U svrhu kontrole namjenskog utroška dodijeljenih sredstava, federalni ministar energije, rudarstva i industrije, Rješenjem imenuje Komisiju za kontrolu namjenskog utroška sredstava koja radi u skladu sa Programom i potpisanim Ugovorom i dužna je sačiniti Zapisnik i Izvještaj o utrošku sredstava. Izvještaj o utrošku sredstava se putem Ministarstva dostavlja Vladi Federacije Bosne i Hercegovine na razmatranje i usvajanje, Ministarstvo ima pravo uvida i kontrole u postupku provođenja odobrene investicije na lokaciji korisnika.

Ukoliko Ministarstvo, na osnovu izvršene kontrole, utvrdi da su dodijeljena sredstva utrošena nenamjenski ili suprotno odredbama ovog Programa i zaključenog Ugovora, korisnik sredstava je dužan izvršiti povrat cjelokupnog nenamjenski utrošenog iznosa u Budžet Federacije Bosne i Hercegovine, u roku koji će biti utvrđen Ugovorom.

12. OBJAVLJIVANJE AKTA

Ministarstvo će ovaj Program i Odluku o usvajanju Programa, objaviti u „Službenim novinama Federacije BiH“ i na web stranici Ministarstva www.fmeri.gov.ba.

13. ZAVRŠNE ODREDBE

Ovaj Program predstavlja osnov za realizaciju svih preparnih aktivnosti neophodnih za izvođenje II faze rekonstrukcije Terminala tečnih naftnih goriva Živinice. Provođenje svih predviđenih aktivnosti – izrada projektne dokumentacije, ishodovanje potrebnih dozvola, provođenje procedura javnih nabavki, izvođenje preparnih radova i stručni nadzor – od ključnog je značaja za pravovremeno i uspješno pokretanje II faze rekonstrukcije, osiguravajući povećanje skladišnih kapaciteta i jačanje energetske infrastrukture Federacije.

Vedran Lakić
Ministar

